

Össur hvass í SvD en lítið mark á honum tekið

Svenska Dagbladet (SvD) segir frá því 11. mars, að Össur Skarphéðinsson sé reiður Anders Borg, fjármálaráðherra Svía, fyrir að segja Íslendinga ekki geta losað sig undan alþjóðaskuldbindingum með þjóðaratkvæðagreiðslu og láta eins og sænska ríkisstjórnin hafi gert það, sem hún gæti, til að aðstoða Íslendinga.

Sænski blaðamaðurinn segir, að sé Össur reiður Borg sé hann enn reiðari starfsbróður sínum í Hollandi, Maxime Verhagen, utanríkisráðherra. Sá hafi gerst sekur um þá ósvinnu að blanda saman Icesave-málinu og aðildarumsókn Íslendinga að Evrópusambandinu. Slíkt skemmdarverk stuðli ekki að nýju samkomulagi. Hótun hollenska ráðherrans þjóni ekki hagsmunum hollenskra skattgreiðenda, því að ESB-aðild auki efnahagslegar líkur á því, að Íslendingar geti staðið í skilum.

Af skrifum sænska blaðamannsins verður ráðið, að honum finnst ekki mikið til þessara raka Össurar koma, því að íslenska ríkisstjórnin sé sundruð í afstöðu sinni til ESB-aðildar auk þess standi ESB-vinir, eins og Össur, frammi fyrir þeirri staðreynd, að kannanir sýni 60 til 70% Íslendinga andvíga aðild.